

本朝分省人物考

人物考卷之十七目錄

南直隸鳳陽府

四

年富

陳翼

王質

郭登

湯胤勣

陳璇

戴昂

張僖

王杲

張袞

高一越

李紹賢

朱儀

陳銳

戚景通

顧佐

董建中

殷雲霄

趙永

薛蕙

李熙

戚繼光

俞大猷

趙本

常三省

劉繼文

余翺

李國士

馮應京

本朝京省人物考卷之十七

南直隸鳳陽府

四

年富

年富字大有懷遠縣人領永樂丁酉鄉薦會試中乙榜爲德平訓導九載赴京擢吏科給事中命掌刑科事糾正違失直氣凜然宣德乙卯吏部推富爲光祿少卿奏留中不下適陝西缺右叅政乃以陞富富峻厲敢爲衆推奏令總理邊儲富至邊遂斟酌遠近定其徵科鉤考收支防其出入由是宿弊頓革正統甲子陞河南右布政使適歲饑流民入境者數萬大肆

剽劫富設法賑恤撫定之轉左布政使土木之變邊境道阻部檄富督運邊糧民聞富督運冒險而進無後期者尋陞左副都御史提督大同軍務兼理邊儲時邊備廢弛法度不立而冒軍功盜邊儲之弊尤甚富痛革之一時武將如石亨輩不得遂其私尤忌之天順初亨諷科道官劾富致仕而石彪憾猶未釋復攔摭逮至京多誣仍致仕不數月起爲南京兵部右侍郎尋轉戶部左侍郎巡撫山東又改左副都御史奏徙降虜之居東昌者用銷未然之患四年春召拜戶部尚書錢穀會計躬任其勞事有關於利害者僚

佐或難之富曰第行之吾當其責公毋署名可也吏胥諸司莫不畏憚束手聽命富以西鄙多事用非其人奏舉布政楊璿知府余子俊可用而請黜布政使孫毓以懲其貪吏部尚書王翱言其侵已職請下于理富曰薦賢爲國非有私也因求退不允忿翱專恣疽發而卒時年七十 上聞之震悼賜謚曰恭定賜祭葬富天資剛勁所至以嚴爲治人不可撓以私及掌國計愛惜用度持正不阿得大臣體然亦爲人所窺伺其屬有作弊者知富多疑遇州郡奏災傷欲其准則言不可准欲其不准則言可准富必反其所言

而從違之適中其姦計焉

陳翼

陳翼字冲霄虹縣人幼有異質其父指以語人曰吾家世農業人知吾所治者稼而不知種得吾兒其稼以獲宣德壬子領鄉薦正統丙辰登進士第授戶部主事歲丁巳虜寇邊王師北征命往永平等處備芻糧百方區畫民不厲而兵饒給還奏稱 旨復出內帑數萬兩命糴粟遼陽實邊廩事竣陞郎中尋奉璽書督漕江西先是歲賦皆卒伍漕輓時 朝廷用武始更以民有司承望風旨嚴程趣辦民始弗堪翼

曰賦無後期足矣奚以亟爲乃循行郡邑求得其富
厚者俾具舟分漕且諭之曰此一時權宜爾師還當
無爾勞衆咸樂從景泰初上崇孝敬錄忠義備財用
清賦罰申舊典體羣臣六事未報聞父訃乞歸三司
御史交章留之 上命卒事翼已馳歸喪次聞 命
復往督漕抵京師而歸終喪會 上命廷臣舉堪任
方面者卽其家拜山西右布政使馳傳赴任問民疾
苦蠲其逋稅至十餘萬石民素利五臺山木至是有
禁翼弛之鴈門旣設兵守禦益戍以民咸釋之使歸
農業暇日築忻州城除道通平西嶺復俾修陽曲諸

學廟而民不知勞 英宗復辟召還拜都察院右副都御史巡撫寧夏時西邊連歲用兵民罷敝甚翼拊循之又籍其貧甚者計口給食奏蠲逋租之累里正者舉宜聖廟祀禮時以歲儉止行釋菜翼曰其費幾何而用以化導邊氓其利博矣俎豆之事吾何敢廢亟復之久之孛來入寇邊將失利翼檄諸部固城堡繕器械募材武士爲土兵叅以官兵守要害旣而朝廷命將出師虜始引去七年陞南京戶部左侍郎 憲宗卽位 勅總督京儲及屯田諸務始至會臺臣建議令諸司察舉其屬翼首劾其不事事者數輩

而薦用其才且賢者廩庾廢壞修復之資向取具于
軍役公有餘材但積以待敝翼曰縻有用之物困無
告之民吾不能牽于吏議以隱忍于心也卽日以便
宜從事復因災異上恤民力錄囚徒裁省鹽糧俸鈔
三事丁繼母憂 賜祭塋旋命起復懇乞終制祥禪
召還京陞南京戶部尚書總督如故三年 賜誥命
進階資政大夫翼感知遇期于盡瘁雖精力漸衰勤
渠治事不敢少貸卒以成疾猶日省署不廢成化壬
辰六月卒于官翼爲人嚴偉立朝稜稜有風望自爲
郎署人已憚其剛直及出更藩鎮入踐臺省位敘日

高年德益茂後進以得接納爲幸而下吏趨走聽令有莫敢仰視者

王質

王質字夢瑾太和縣人由鄉貢爲南陽縣學訓導秩滿擢監察御史宣德十年陞四川叅政尋陞山東右布政使正統六年陞戶部右侍郎八年刑部缺尚書上命廷臣擇老成有學公廉謹厚者衆以質對遂陞刑部尚書居五月以失獄囚左遷戶部侍郎會閩浙銀場盜起命質往治其事至彼得疾或謂行可少緩質不聽至杭州武林驛卒有司爲備棺歛送至故

里計聞遣官賜塋祭質爲人平易廉而不苛在四川
嘗言十事皆中時弊每行郡邑不食肉惟啖青菜蜀
人呼爲青菜王

郭登

郭登字元登臨淮人營國公英之孫也正統七年征
麓川靖遠伯王驥薦登爲副將鎮臨安檄召諸夷長
宣布 朝廷威德諸夷長帖服爭獻珍貝不受十四
年七月也先入寇 天子親征至萬全西寧侯宋英
武進伯朱冕相繼覆沒乃拜登都督僉事副廣寧伯
劉安鎮大同尋 詔班師登語學士曹鼐張益曰

駕還宜從紫荆關鼂等入奏已得請從紫荆矣俄折而東竟從居庸未入而天子蒙塵大同城門晝閉軍士多戰死所存皆創殘登涕泣循之弔死問傷親爲裹瘡傳以藥或謂登曰事已至此城旦夕且破何空自苦乎登曰吾誓以此城存亡當不使諸君獨死也八月也先奉上皇至城下索金幣萬計約賂至卽歸駕登閉門不納上皇傳旨曰朕與登有姻婭何外朕若此登傳奏曰臣奉命守城不敢擅啓閉竟不出校尉袁彬以頭觸門大呼給事中孫祥知府霍瑄乃出見納賂而也先實無歸駕意登曰此給我耳

及擁上皇去登大慟時賊勢張甚獨登守城十月
虜寇京師登率所部并糾集忠義從廂門入援十二
月虜又將犯京師登奏言京軍新選不可輕戰宜分
營犄角以逸待勞以主待客勿求僥倖務出萬全虜
自屢勝以來出入自由不聞有出一兵拒之者登不
勝憤晝夜以忠義激勵其軍定爲賞格期必殺賊諜
報東驛賊入境登率兵躡之行七十里至水頭日暮
休兵夜二鼓諜報二十里外沙窩有賊營十二將士
皆曰賊衆我寡莫若全軍而還登曰我軍已去城百
里且疲困一退避賊以鐵騎來追雖欲自全得耶按

劍起曰敢言退者斬進薄賊營昧旦賊以數百騎迎戰登奮勇先登諸軍繼進呼聲震山谷登射殺二人手刃一人賊大敗追奔四十餘里至栲栳山共斬首捕虜二百餘騎奪人口牛馬以萬計捷聞封定襄伯登廉慎有謀與賊大小數十戰未嘗挫衄善撫士卒有古良將風 英廟復辟命掌南京中軍都督府事尋謫戍甘肅 憲廟嗣統復爵鎮守甘肅以薦召還總神機營掌中府事尋命提督十二團營多所建明登工詩所著有連珠集謫甘肅時有詩送丘正曰青海四年羈旅客白頭雙淚倚門親莫道得歸心便了

天涯多少未歸人又曰甘州城南河水流甘州城北
胡雲愁玉關人老貂裘敝苦憶平生馬少游

湯胤勣

湯胤勣字公讓濠梁人東甌王和之曾孫也少負才
使氣兩眸睜然髭奮起如戟年十五六入學爲生徒
日記數萬言學有舊版字千餘胤勣騎馬過一目成
誦應天尹下學傳籌召諸生胤勣獨後至當筭大呼
行尹聲撼庭木尹愧憤卒筭之胤勣攘袂出學門題
詩府署合扉上有從今袖却經綸手且向江頭理釣
絲之句遂去學出游江湖上凡吳越間豪家富室爭

延致之周文襄公轉運江南聞其名召之至曰王孫
能作啓事否胤勛請紙筆卽席具狀幾萬言又切當
世務文襄奇之上書薦其才兼文武具驛召赴京時
于少保方督諸軍請試之立胤勛將臺下萬卒環視
于公摘古今將略及諸史中事舉以問胤勛應對如
洪鐘不能屈左右嘖嘖歎賞于公亦撫掌曰吾子誠
有才入對以爲錦衣百戶後以裨帥出守孤山堡力
戰死之爲人軒豁倜儻好以氣雄人不問名位卑顯
有不可意奮然去不顧爲詩豪邁奇崛如風雨晦冥
中電光翕焱使人不敢正視每就人席上操觚立成

數十章卽能詩者亦多爲其所懾或不能措一語以遁平生著述有五雲清唱風雅遺音東谷集十餘卷

陳璇

陳璇其先江陰宦族洪武中徙家鳳陽兄弟十人皆俊偉傑特璇天資尤穎異甫冠充郡庠弟子員蚤夜孜孜篤志於學不煩師資而學業日進嘗與同輩曰吾輩爲學當思不止於掇科可也苟惟圖此以進身而不思其遠者大者豈足以報朝廷之作養乎迨登進士第拜監察御史凜乎風裁不察察而明不沒沒而暗知者以爲得風憲體時從兄耘字德耜亦爲御

史間語人曰某性褊迫終不若吾弟之雍容寬裕喜
怒不形他日遠到吾必不若也嗣後璇果膺敘遷陞
雲南按察僉事鎮守雲南都督沐公讀書善談論於
人不輕許可至京有詢及雲南方面官者曰無如憲
僉陳某未嘗倚法以凌人亦未嘗廢法以貸人迨陞
浙江憲使浙江地大事繁爲憲使者百責所萃每難
其人璇凜冰玉之操不動聲色凡所設施寬不致縱
猛不至殘方面肅清浙人無間遠邇靡不向風而懷
德者值考察有以蜚語中之璇卽日啓行赴闕聽進
止而浙之軍民咸動容蹙額如失父母者不啻數千

人填衢塞巷率憊憊以挽留之至馬不能前不得
始暫駐于城之宗陽官黎明取間道而去而浙耆老
李恒寺先抵京奏陳其政蹟願得拔留 朝廷仍令
還浙視事璇平生內貞外和學脩行篤故于臨政雍
容自若不銜不矜惟以正人心厚風俗爲要自始至
終一以德意臨人故人德之獨深焉

戴 昂

戴昂宿州人正統戊辰進士選擢御史以言事忤
旨謫湘口驛丞陞濰縣知縣在任九年上下愛戴後
卒于家都御史秦公紘特拜其墓親爲文祭之

張僖

張僖靈璧縣人景泰甲戌進士選授山西道御史以
建言謫末寧令丁內艱復補餘姚邑有水怪虎患僖
爲文祭之遂息陞杭州知府值歲飢設法賑濟全活
六萬餘戶晉湖廣叅政未行卒于杭祠祀之

王杲

王杲靈璧縣人成化丙戌進士授樂安令立毀淫祠
百餘楹民有火患徃碎其妖神患遂息鋤強扶弱一
境肅然歲凶賑濟全活尤多擢監察御史歷右通政
時李孜息以方術惑上䟽陳其奸惡言甚剴切未幾

改太僕少卿卒于官賜之諭祭

張袞

張袞鳳陽縣人成化舉人授蒲江令卓有能聲調劇固安時流賊縱掠所過誅屠袞捍患孤城保全生聚邑舊俗婚姻論財多有過時失偶者因權豐約以著令嚴禁舊俗洒然一更會入覲儀觀偉然逆瑾見而異之陰論賄以二千金臺省惟其所欲嚴詞以拒瑾大怒矯令緹騎逮捕士民咸欲歛金入賄袞耻以賂免遂仰藥死邑人哀思如喪考妣爲專祠祀之

高越

高越鳳陽縣人成化舉人授山東福山諭時劉賊猖獗縣令棄城走首倡忠義嬰城死守賊退事聞超拜監察御史清軍湖廣革親藩之僭巡按遼左明功罪嚴軍實積弛一振出知泉州府引江水開八卦河植清源山樹泉之人文始盛致仕歸

李紹賢

李紹賢盱眙人進士觀政戶部解銀餉邊舊有火耗羨餘約數百金悉籍付有司盡以其費還部授行人正德中武廟議歷淮泛浙由金陵浮漢沔人情洶洶思變叵測紹賢約諸部曹郎張元承等連疏入諫

上怒下錦衣獄時有貢諛叅劾各屬爲妄言者 天
威遂不可霽 詔于午門外俱去衣杖五十謫戍降
調共二百人有奇時死杖下者十有一人而紹賢與
焉至 世廟御極詔錄一子賜之葬祭

朱儀

朱儀字炎恒世爲鳳陽懷遠人生而器宇凝重具文
武材景泰壬申嗣成國公 景帝當祀太廟偶不豫
夜宣旨遣儀攝事倉卒無違禮丙子命治周世子喪
財省事集 英宗復位見儀而喜曰平陰有後矣
孝恭章皇后之合葬景陵讓皇后之改冊皆命儀行

禮壬午命持節封蜀王勞錫無所受嘗較射內苑連
中的上喜甚錫寶鏹一篋自是始有意大用之癸
酉奉勅掌南京中軍都督府事賜白金三十兩金織
蟒衣一襲甲申憲宗嗣位申命以行時南畿大饑
奉命賑收議令獄囚贖米及都城商稅錢鈔皆以市
米協賑所活甚衆時游食頗盛議京伍未實宜使此
輩應募爲兵可得若干人鹽徒彭釗強賊李相爲江
路患督將校跡至九江獲焉疏薦都勝守備儀真勝
果廉明後官至總漕都督戊子旱奉勅會獄囚多
所矜釋又議都郡歲輸軍儲許臨船預放省耗得十

餘萬石貯于倉倣古常平法行之會有詔諸守臣符
驗皆進繳儀言南京根本地事有緩急非符驗不能
速達又遣官勾稽管籍儀言舊制軍數不宜泄事皆
寢城門守兵盡隸營伍止留老羸數人儀始定番代
法海賊劉通勢甚猖獗衆議招撫之儀謂必先聳以
兵威方可懾服乃遣舟師分據要害賊勢窮歸罪械
其首惡檻送京師脇從者皆釋弗治海道以寧乙巳
星變求直言所陳多切時弊屢上疏辭不許加太子
太傅視事如故奉勅修葺孝陵明樓并修欽山十廟
二役成有旨嘉勞刻石紀功暹羅夷人入貢還泊龍

江市中國子女爲奴婢事覺或言宜寘不治儀曰事
開國體不宜置若罔聞遂舉正管押通事官追給夷
價各遣歸其本里每歲錄囚儀當執筆必從容訊問
務求其情尤嚴祀事凡代事南壇太廟者各四社稷
山川孝陵及大江之神各三以常典祭者不可紀皆
夙夜虔凜未嘗少怠前後同事文武僚屬寅恭協一
久而彌篤以弘治丙辰卒于正寢訃聞上震悼輟
朝一日詔贈太師謚莊簡子朱輔嗣爵遭世承平無
可自見賜第有古槐一株疎陰滿庭時時挾一冊就
其下臥且讀焉其爲詩長篇短什皆流傳縉紳間被

服冲素言動恂恂如諸生丁丑守備南京己卯逆濠
犯安慶遠近震恐乃與白巖喬公畫策戰守以身任
其安危人于是咸稱爲馮翼祭遵之流亞也辛巳召
還京未幾卒于里第而以子希忠襲封 世宗南幸
承天道衛輝行宮夜火侍衛倉卒不知駕所在獨希
忠與陸都督炳翊 上以出嗣是恩遇日隆而希忠
亦復嫻于文墨嘗侍御舟賜詩屬和操筆立成 上
謂輔臣曰勲裔中如此人才絕少稱善者久之是秋
充神機營總兵官庚子提督團營加授太保庚戌虜
薄近郊部署諸將城守捍禦虜退加太子太師改掌

後府事壬戌加太師 上眷倚方隆而竟以疾不起
贈定襄王謚恭靖 世宗以威嚴馭下雖素所親任
輔舊往往被譴斥而希忠獨被隆眷三十年遭遇亦
甚顯奕矣

陳 銳

陳銳字志堅別號雲谷莊敏公豫之子也生而膚體
碩大方在孩幼言動簡重及長勤問學善詩文天順
甲申襲爵明年成化乙酉奉使江西歸尋奉命直宿
帶刀侍衛及坐團營管操眷遇日隆庚寅簡命掛征
蠻將軍印總制兩廣軍務賜金蟒綵段白金宴東閣

門至廣處置有方軍民受惠夷虜咸服壬辰移鎮淮
陽掛漕運印充總兵官籌畫簡便多可爲後來法嘗
條陳便宜二十餘事皆見允納己亥日本使臣進貢
還于濟寧沛縣等處鬻買男女數十攜歸過淮銳償
其值贖之給舟遣還其父母又于淮河壩改石閘于
濟寧分水龍王廟自南距北可十里各置一閘以節
蓄水利壬寅淮多疫癘死者相枕召富人勸募殯之
有司命醫診視給藥病者日給糜粥如是兩月全活
萬計總漕事十四年河道之修築轉漕之利弊前後
建疏百有餘章乙巳改管南京中府事丁未夏奉勅

修理 皇陵弘治戊申奉詔總神機營軍馬掌左軍
都督府事己酉總五軍營訓練調習皆有條法號令
嚴明恩威兼濟官軍畏服癸丑河決張秋奉勅督治
河道加太子太保乙卯回京加太保兼太子太傅歲
增祿米二百石及白金綵段之賜丙辰命冢子熊爲
勳衛侍衛殿廷是年三月皇太子加冠特命持節行
三加禮燕勞復有玉帶蟒衣之賜丁巳夏以病懇辭
兵柄 上慰留戊午春皇太子出閣侍讀經筵加太
傅兼太子太傅庚申四月北虜犯大同宣府勢甚猖
獗 上簡命掛靖虜將軍印充總兵官出師勦殺七

月奉命還京疏乞解印歸里第家居杜門數年而卒

戚景通

戚景通字世顯定遠人其先百戶祥以畧地戰死世襲登州衛指揮僉事景通長幹修髯常席地讀書當暑不輟劉瑾結豪傑爲逆陰遣人遺席帽約曰某日發難着此者爲劉景通旦日爲黃冠遁去將率六郡良家子赴不測瑾敗乃還青州賊李琪反王副使良臣分部擊之弗克景通微得琪與姦民出入狀將數十騎往跡琪夜至伏姦民舍旁遂擒琪頃之流賊橫行山東檄景通守鄒以七百人往入門告母遂行師

出平度道中忽賊遇人曰賊衆我寡盍避諸景通曰
彼卒遇我安知衆寡且成師以出義不避難陳以待
賊擊卻之遂入郤登陴誓衆嚴守備一日帥輕騎過
孟子庄賊大至列陳如前邀賊遊騎擊殺之賊復遁
先後凡數十捷六月過戰場僵屍枕籍衆皆掩鼻景
通曰偉哉國士名與骨俱香吾誠得與同遊九原無
憾矣爾曹顧病之邪騎過沮澤中率先下得休其餘
力遇賊輒有功兵罷陞江南運糧把總至則祛積弊
卻羨餘比輸太倉故有鬻壽之弊客以告作色曰景
通自結髮事君壹勿欺吾寧受薄責毋寧自欺已輸

倉不中計對簿度支當降級所部張千戶者懷贏金二百餽之景通笑曰吾以不欺受罪顧納贏金爲欺耶事白復官戚勳以總督備倭至欲引爲同姓景通謝曰先世故姓倪載在勳府卽自附璽書之謂何卒却之進督備倭尋陞大寧都司掌印河間治河久未底績屬爲植不踰月而告成奉 詔坐神機營母閭貞節年老請終養從之仍支俸山東便奉給景通白首子舍每上食率諸子女弄雛戲一不當母心蒲伏請受杖母有疾夜叩北辰請身代居喪哀毀斑白始有子曰繼光繼光綦履過庭景通大詬曰童子何知

蒸履必錦衣錦衣必肉食爾父清白必不爾饜爾他
日將饗卒伍以自封旣知爲外氏所遺卒裂之居第
垂二百年始改作命綺疏四戶列兩楹間工請益綺
疏十二景通曰使我無得罪于世猶聚族于斯四
戶足矣不然此且不保季年畫策備胡累數百牘其
後趣繼光受職京師病革猶問吾所上備倭封事上
納之乎未耶垂絕舍人納楮幣褰中瞪目曰我平生
不索人錢冥司必不受我錢悉出之乃瞑後繼光著
戰功爲東南名將

顧佐

顧佐字良弼鳳陽臨淮人登成化乙丑進士授刑部主事歷員外郎郎中時錦衣衛都指揮牛循嘗怙勢殺人鎮守宣府太監顧雄分守紫荆關監丞鍾欽事多不法佐皆按致其罪識者韙之成化十九年出知河間府貴戚莊田碁峙境內聞佐至皆戒其下不敢乘勢輻輳親校冊籍吏無所容其奸驛司給供應令民計畝出錢里中得免于賠累郡有蓮瑞秀麥之謠二十三年進四川副使整飭建昌兵備越雋山崩地震民駭蕩析佐憊心力撫循民以安堵弘治三年徵拜大理寺右少卿丁憂七年補左八年進右僉都御

史巡撫山西九年改南京都察院提督操江十二年
進右副都御史十六年陞戶部右侍郎十七年六月
北虜小王子求貢甚急兵部擬差佐往宣大整理糧
草十八年三邊告饑 孝宗命兼僉都御史往蒞之
比至條陳便宜多方區畫始有三年之積正德初戶
部尚書韓文率百官伏闕上疏得罪去佐遂代其任
時逆瑾盜政威權日熾諂諛成風佐自若也瑾性極
貪酷而外假仁義諷諸司各進羨餘以入私藏佐曰
吾部無羨餘者瑾啣之未發也後瑾憾韓文不已捃
摭百方無所得會部有故冊逸弗得瑾欲以爲韓罪

嗾佐上其事持不行因奪俸三月佐曰可以去矣遂
引疾乞歸疏再上允卽行瑾令邏人訶其過無得命
官按三邊儲蓄有紅腐則以爲罪 詔罰輸米八百
石于邊遼東邊糧以菽易米弘治中有 旨准行又
以爲佐罪罰輸三百石戶部有缺失又以爲佐罪罰
百五十石佐素貧至稱貸以益人皆寬之無慙色正
德丙子十一月卒于家年七十四佐貌溫氣和內守
堅定立朝四十餘年當財利紛華無所漸染權奸歛
斂無所跛倚初壽寧張公發自河間佐爲河間守嘗
有德焉比當路每輸忱于佐佐謝之及壽寧有召朝

士全集而佐獨不往時王端毅爲冢宰亟稱之始知
所自逆瑾伏法其事益明及訃聞贈太子太保

董建中

董建中字湯民鳳陽人也湯民少與邑人殷雲霄相
友善以修學倡鄉人又取呂氏鄉約爲課每大書壁
爲勸誡弘治乙丑舉進士授行人晉官御史湯民惇
大而有執蒞事精悍初其父吳江公貧喪其配楊葬
具薄陋湯民日夜號泣吳江公在太學繼妻暨子留
壽張湯民涉水負粟販之以給朝夕歲凶兄弟將異
居湯民泣止之不可往白于吳江公亦不可乃以田

宅讓兄弟指其婦曰吾婦幸有奩不累諸兄弟也爲御史時值盜四作嬖人僭柄朝有邪臣威脇爵餌直道幾杜湯民挺挺自持立節不撓甲戌按順天遣其妻子還獨留老奴司戶母敢私謁永平大水民漁以生權閹奪之斷其罟罾有嫗與其子哭于野湯民行部見之廉其實卽上疏劾閹人曰奪漁是無民也無民是無君也無君者戮無赦閹人懼而縊海葦擦漁之利然後悉歸民又有閹人將之廣過任丘奪御史府以居聞湯民至列健卒以待有司懼迎湯民于路跪請避之湯民弗許直入坐堂上視政如常大閹驚

辭去有二青衣持勢人書至語人曰往太監皆無能
故屈御史下吾之來非有託也將挑之與角勝負耳
既入書湯民不啓封火之以詐罪二使流于驛霸州
男子自首爲盜趙鏐弟興幸不死實賊託以爲間者
湯民立命斬之命修州城以備湯民沉毅慮定而後
發卽不可易嚴于治吏而不苛以其暇復射圃修元
節士劉因祠以禮教節義誨儒生乙亥得痺疾已以
吳江公喪歸明年八月卒年四十有二

殷雲霄

殷雲霄字近夫鳳陽人元末有諱仲名者避亂東平

因家于壽張雲霄修眉碧目口可拳體羸而骨健讀書數行下旣成誦終身不忘舉弘治乙丑進士以疾歸居石川作蓄艾堂聚書數千卷旦夕玩誦思以作者自名多所著述病愈還京授靖江知縣雲霄明察有斷不勞而治蘇盜過江淮渡江掠常州將入靖江謀知有備乃入江陰雲霄發兵追之江陰得完民朱鎧死于文廟西廡中莫知殺之者忽得匿名書曰殺鎧者某也鎧素讎某衆謂不誣雲霄曰此嫁賊以緩治也密問左右與鎧狎者誰對曰胥姚明乃集羣胥于堂曰吾欲寫書各呈若字視明字類書詰之爾素

狎鎧殺之何故明大驚服曰鎧將販于蘇獨吾餞之
利其貨故殺之耳乃殺明調青田雲霄雅好游眺川
壑覽物歌詠靖江青田有大江孤山混元峯每暇輒
出嘯詠其間曠然自得選授南京工科給事中上疏
言事者五曰清弊蘇民曰安重地曰防奸微曰除邪
以全治曰公賞罰既病封其疏題曰理真事曉意忠
詞馴付其母曰茲以歸雲霄弟遂卒年三十七初父
卒雲霄治喪既卒服始冠將昏與其妻父母約必如
昏禮乃舉後又考訂古今祭禮行之爲文非秦漢語
不習自漢魏至唐作詩者皆辨其音節而擬之又覽

莊周書說其達性善喻竄後自病太博必六經之旨
然後究心焉國子司業穆孔暉篤行苦學無匹猶畏
雲霄曰近夫之耻不善不啻負穢所作有古樂府四
百篇集志彀錄金僕姑數十卷

趙 永

趙永字爾錫臨淮縣人沉靜簡默博洽淵冲從大學
士李文正學文正曰此子風骨不凡而造詣宏博遠
到之才也登弘治壬戌進士授翰林編修纂修實錄
忤逆瑾瑾欲左遷銓部疏勤慎竟復職瑾終銜之永
裕如也辛未甲戌兩主會試文衡崇雅黜浮文體復

古授侍讀轉春坊 太子右諭德充經筵講官奉

命主武舉 武廟南狩以居守有勞 賜金麟服陞

國子監祭酒表建師模嚴飭士習抑請託進廉節動

遵矩範不阿權要海內嚮風翕然丕變 世廟登極

仍命直經筵兼日講官每進講必先焚香閉戶積誠

滌慮以冀感通 駕幸太學賜坐講尚書大禹謨敷

陳剴切進止雍容 上屢注目罷講 聖諭褒獎翼

日率諸生謝表 上賜勅及彩幣二襲仍賜宴寵異

偶因疾在告 上念講官無直諫者遣鴻臚寺賁

旨至臥榻諭起供職永感恩流涕力疾入謝未幾復

以言忤當路辭解日講轉南京禮部右侍郎尋擢部
篆永修禮敦俗風化一新時內閣缺輔臣永負時望
大學士楊一清恐相遇不合佯以他意挑之永曰吾
可以纓冕冕吾道乎具疏乞休隱居都下不出戶庭
都給事中董進第御史王瑛率諫垣臺臣薦永名重
玉堂化覃璧水退居于輦轂之下而踪跡愈幽充養
乎經濟之才而聲猷實富吏部亦首疏起永竟不出
築精舍數椽繚以筠檜橫琴抱膝若將終身嘉靖戊
申卒于家壽八十所著有類菴稿文華講義南京錄
瀛洲詩北歸稿

薛 蕙

薛蕙字君采鳳陽亳州人第進士授刑部主事病免起爲刑部主事調吏部考功主事歷郎中人遂稱薛考功云蕙自爲刑部時值 武廟南狩抗疏諫禍將叵測蕙宴然安之及嘉靖初大禮議起廼撰爲人後解爲人後辯奏入下獄已而復官權貴人乃甚不憚會給事中構其罪蕙上書訟坐是罷後竟屢薦不起家居十八年卒蕙才思清淑脫屣塵壒中歲好養生家言收斂耳目澄慮默照如是者數年久之乃悟曰此生死障耳不足學然因是讀老子及瞿曇氏書得

其虛靜慧寂之說已而証之六經及濂洛諸說至于中庸未發之謂中曰是矣是矣故其學以復性爲鵠以慎獨爲括以喜怒哀樂未發爲奧以能知未發而至之爲竅後又爲約言五經襍說二書居鄉絕不肯爲人干請至戚里有疾恒親爲製藥嘗脫衣施凍者或曰焉得人人而濟之曰吾不愧此心耳始號西原居士后扁其齋曰太寧齋更號太寧齋居士而世猶稱西原先生云

李熙

李熙字仲光號緝菴其先定遠人也祖彬翊 高皇

帝啓運累功爲都督僉事永樂中以征討功進封豐城侯食祿一千石賜鐵券世襲暨錄平安南功加祿五百石熙襲祖爵嘉靖甲午奉 命統耀武營操練官軍隨以廷臣會推掌中軍都督府及提督神機營壬寅 欽命充總兵官掛平蠻將軍印鎮守湖廣乙巳楚世子弒逆株連數百人熙惻然憫其冤諮於直指伊公相與平反釋其無辜幾二百人沅州麻陽洞苗作亂遠邇繹騷調兵征勦歷三載底寧諸凡經略出自已裁不少假麾下而悉中機宜敵愾奏功勲庸顯於遐服處之則以謙焉庚戌奉 召回京掌前軍

都督府事熙廉府中宿弊嚴爲禁革人不敢干以私
辛亥奉 敕提督京城九門官軍壬子總督京營戎
政時軍伍疲耗往者率因循行事熙一以精明振刷
而綱紀之諸材官咸凜凜奉法大司馬良鄉趙公永
豐聶公並嘉其賢以爲勳臣可倚重者而忽以疾終
得年五十而已

戚繼光

戚繼光字元敬號孟諸定遠人景通子也幼而好弄
押闔多權奇始舞勺隆準方頤轂而鷹揚英氣勃勃
昂然爲萬夫雄已折節爲儒以經術著旣冠上勳府

襲世官旣孤家故不造庚戌待試武闈匈奴大入部
列城守簡材官戍九門繼光條上便宜部當其議山
東歲遣治兵使者部六郡良家子入戍繼光任中軍
務輯衆心一軍皆服進備倭都司尋轉浙江都司僉
書會倭難甚浙殘矣上練兵議其略曰無兵而議戰
亦猶人無臂而格于將乃今烏合者不張徵調者不
戰吾不知其可也聞義烏人其氣敵愾其習慄而自
輕宜可鼓舞及今簡練訓習一旅可當三軍督府乃
檄光亟募三千人假以節制乃間長短兵夾振而進
隊立一人爲長偏則伍之倍則什之犄角互張攻距

擊刺互用是名鴛鴦陣居無何卒服習矣督府請補
浙東叅將將分部台州辛酉島夷入台州睹旌旗皆
辟易所嚮以全取勝時新兵若發硌至如破竹其年
江西告急督府檄光西行旣捷露布以聞軍聲益振
久之閩寇益張兵食無措徒負長技擐弓躍馬當先
一倭操利刃迫之斷馬尾而免寇分壘爲三窟一據
橫嶼一據牛田其酋長壁莆東南出沒焚掠山寇陸
梁海寇盤踞廣叛兵乘亂出入毗若無人言者謂督
府兼制八閩亟解懸以希悔禍乃屬光部兵八千往
自橫嶼趨牛田俘馘立盡他夷部繼至截先登者五

之三其二突圍南奔窮追絕跡旣入省會勒功平遠
臺甫班師寇入莆城又三宿驛聞督府逮京師大司
馬趙公代督府乃發浙餉屬募精兵萬人閩望援兵
日幾幾如望時雨兵至斬獲無筭寇枕藉而死屍以
澤量當戰務釋俘囚蠲脇從視首功居多隆慶初虜
陷石州東薄昌黎幾不守用廷臣議召譚司馬戚總
戎入策備邊總戎三書備陳七原六失四弊大較言
兵制西北什倍東南虜馮積威劫邊人邊人望風而
靡戰將率賸軍費參外舍兒視虜飽歸尾而勦掩老
羸爲功級旣贖而賞有差刲羶首以當雄飛彼自以

爲得計借曰當戰鮮不唾之且不練何以議兵無兵
何以議戰練兵之效嘗試之東南請簡部將若而人
分出三輔州縣部募三千丁壯部將將之合爲四營
營各五部每營立一裨將爲之連衡總攬折衝則主
將專制簡練訓習一如東南比及三年堂堂乎可格
虜矣長驅出塞務令咋指而避窮廬迨其非時則大
舉討罪之師逐北而虛大漠然後屯田足餉罷戍銷
兵坐致富強則百世之利也部持可否聞者發言盈
廷司馬私語總戎吾舌敝矣如不入何第捫舌勿談
總戎自言世受秦養敢不私效愚忠用則腹心干城

不則馬革無問舌矣既譚襄敏出就督府命總戎督練四主將兵節制視督府同筴者謂太阿之柄不宜假武人于是以總理專任薊門卽不易銜而練兵之議寢矣復上言薊當肩脊幸而任臣臣無多言在薊言薊塞上周垣二千里一瑕則百堅皆瑕比年遞修滋費無益請更版築諸戍士畫地受工跨墻爲臺睥睨四達臺高五丈虛中爲三層臺宿百夫械器餼糧俱在虜至則當俾以守退則畚耒力詘未能舉羸先築千二百座薊人多木疆律之軍正將不堪請募南中人數者一軍以倡勇敢督府上其議許之始募

南兵三千如期至陳而待命郊外自朝日雨甚至于日中軍容益莊總干山立邊將大駭將軍令固如是乎旣相要害程功能部署臺垣之役工力籍班軍則以南兵爲渠長薪木取諸塞外其餘則以益樵蘇最賞決罰有差不旬月告成事是役也在縣官僅發十萬緡經費考工足當百二十萬復增募南兵二萬編伍戍之議立車營出戰則以代城郭車四面結勒爲方陣步騎二旅中藏之遇虜乘陴火器先薄五百步外稍近則步兵出轅下距虜馬排擊之虜却而奔則縱騎兵乘勝逐北慮師不宿飽復益輜重營以從有

發則南兵當選鋒入衛兵策應主兵戍守踐更者任
轉輸首分數次刑名次技擊次步伐次偵選次嚮導
次批擣次遮擊次追襲次俘馘次首功軍政畢張無
不以律比年東虜謀入犯西酋得薊狀遂欵關入貢
部言虜數苦薊比修內備不戰而伐虜謀卽軍正無
所課功其功上上再論功最進中軍署都督同知充
總兵入薊擁總理名秩如故及江陵當國 上遣右
司馬出行邊于時大閱薊門十六萬之師畢至營伍
必整旌旗火鼓必齊約束必堅號令賞罰必信比還
報悉以狀聞旣畢使謁江陵上輔兵議江陵則以征

伐自 天子出其如 主幼何旣而遞修薊功遞進
左都督加秩少保兼太子太保移鎮南粵虜入黑峪
關薊人願亟召還不得請則勒石頌德尸祝之光度
嶺南任疆事如二鎮踰年疾作得謝還歲散千金徇
客急歸而益貧卽延醫治病且無資丁亥始及耆蜡
日鷄三號將星隕矣子僅襲祖職得指揮僉事不遑
以賞格聞本兵以光功高將請卹典而究不果光在
浙有紀效新書在薊門有練兵實紀鑿鑿見諸行事
非徒托諸空言者

俞大猷

俞大猷其先鳳陽人世爲泉百戶髫髻時輒倜儻以豪傑自命家酷貧日不能再爨顧誦讀不輟銳意文事已父卒襲官學騎射輒命中從李良欽學擊劍盡其術益悟常山蛇勢以爲兵法數起五猶一身五體雖將百萬之兵固可使合爲一人也嘉靖中登會舉高等以千戶守金門上書兵部使者呵辱之奪官大猷笑曰此豈吾自見地耶遂盡鬻其家遊京師以書干毛尚書伯溫翟侍郎鑾翟得書驚歎禮之驚一軍然終不盡用乃奉勅守汀漳遷廣東都司會安南叛人人欽廉爲寇諸司議募陸兵大猷曰賊由海來

獨當以海舟破之若專備于陸賊舍此擊彼我不勝其備賊不勝其擊彼逸我勞非計也乃多集海舟以擊之連破之永安萬寧而安南函賊首以獻倭難作大猷以南直隸副總兵戰平望王江涇六金壩皆連捷而提督尚書張經以視師趙文華言論死大猷坐落職奪祖官于是東南之禍日亟復浙直鎮守而大猷言防江必先防海水兵急于陸兵蓋倭奴長陸戰令樓船高大集萬銃其上倭船遇之輒摧壓焦爛固我兵所長也善戰者毋以短擊長而以長制短且海戰無他法在知風候齊號令以大舟勝小以多勝寡

耳于是用舟師戰而積歲不除之賊皆勦盜王直者
徽人也以亡命入海勾倭夷貿易爲逋逃主 天子
以連歲倭變皆直故責督府胡宗憲必得之大猷言
直在彼國一逋逃夫耳倭之來不來非關直誅不誅
也若誘之來而殺之則失信且何以示後請諸宗憲
不聽誘以來 天子聞得直大喜詔殺直于是宗憲
恚失信怏怏曰吾爲俞帥笑矣而羣倭聞殺直焚舟
死戰大剗入閩宗憲懼乃奏言大猷違節制不窮追
爲解而大猷逮詔獄謫戍邊饒平民張璉反流陷江
閩諸州縣 詔諸道合師二十萬討之而大猷遷南

贛將時胡宗憲已奉 詔兼督江廣聞璉出行剽下
檄言賊棄巢出此自投死其速擊大猷前以違節制
見劾幾得罪欲言恐禍及欲不言恐敗事已乃曰吾
豈以一身之禍忘國事哉乃具言璉雖離巢出劫其
妻子財寶乃在巢若我以大軍迫其巢彼必聚衆自
救譬之虎方逐鹿熊據穴而搏其子虎安得不置鹿
而還還而感之如拉朽矣且三省會擊有期又豈可
以數萬之師從一夫團走哉于是引兵萬五千人疾
走柘崗嶺瞰璉巢賊果歸保巢而大猷出擊俘斬者
千餘于是潜使說璉黨執璉已爲兩廣帥所奪或請

訟之大猷曰賊惡其不滅豈必在已翌日班師不殺一人以示信陞副總兵賜璽書加節鉞命控制江河閩廣四道兵加祖官一級會倭陷興化大猷自贛晝夜馳赴之駐秀山都督劉顯駐明山而都督戚繼光提浙兵未至上怒督府失泉城責戰急而閩士夫又洶洶急功大猷念賊且萬人能戰入死地官軍數僅相當若迫城而攻之彼實我虛彼飽我饑彼逸我勞一挫而東南之事去矣且敵以戰爲守我以守爲攻不若列營以困之于是星布兵營畫地鑿溝令東西通而列柵其上賊挑戰不動閩士夫訟共詬病之

已竟殲賊諸將各加秩而大猷止賜金幣蓋閩士夫
業已爲流言聞之朝矣倭三萬寇潮州與盜吳平相
犄角爲廣患 詔移鎮潮廣羣盜憚大猷名競出降
吳平雖不能堅決然亦詭殺倭自效遂與倭人絕于
是大猷請于督府吳桂芳曰韃賊以出邊爲生路山
賊以歸巢爲生路今潮兵驅賊入益深則益以闖耳
是死路也當大集精兵十圍五攻無使片甲得還于
是將漳兵二萬以來果破平而御史以招吳平爲大
猷負坐免官都御史爲之抗言于朝乃得留二源山
袤千里賊據洞如蜂房水窩介三郡六縣之間而雲

溪尤固大猷曰此當誘而聚之者也遣王鸞者盛駟從充裨將爲死間賊得鸞自安而大猷日發兵擊旁諸巢之未下者以趣之諸巢果畢聚雲溪以緩討乃陽言誅李明過雲溪橋賊出牛酒犒兵須臾兵悉集擊破之于是賞先登酬死間而東峒遂平桂芳上其功有云董五哨十萬之全師如奕棋著著先手剪三郡六縣之妖逆如振落次次剗平蓋大猷爲將事先必周慮萬全旣事往往爲善後長久之畫爲人易簡無町畦而有容善忍功則稱人罪則稱已叅將楊克寬罪抵死大猷力爲當道言克寬忠勇慣戰請保任

不效甘同罪詔獄時妻子寄食甚窘百戶鄧城亦就
逮適有遺數百金者立與之平生蒞官誓衆陳師鞠
旅一決于理雖支干孤虛雲物氛祲堪輿奇遁未嘗
一訊焉譚侍郎綸與書言綸近對人言節制精明公
不如綸信賞必罰公不如戚精悍馳騁公不如劉然
此謂小知誠如霍子孟任如諸葛亮大如郭子儀忠
如文文山毅如于蕭愍可以托孤寄命則公之大受
然也爲時所信重如此

趙本

趙本字宗立鳳陽人祖端沉鷺剛果屢從征伐積戰

功歷陞福建興化衛指揮僉事父麟代職拜鎮國將軍廣東都指揮同知本甫生而父歿旣長襲任邳州衛指揮司督造海舟創新闢運神木以營宮殿才能卓卓著稱于戎事尤爲練習凡從征沙漠者四以功褒賞久之陞山東都指揮僉事領兵更番護衛京師撫馭有方得士卒心歲甲子山東旱饑戶曹奏准停支屯田卒月糧本曰支尚食不給不支則轉乎溝壑必矣仍發廩放支僚吏執不可本曰有罪在我因以聞于朝卒得請賴全活者甚衆未幾以疾卒于官本器量淵洪風采凝峻以父不逮養事母極其誠孝居

喪哀毀踰禮蒞官行政寬猛得宜處僚友和而下
衆臨敵善謀而有勇公餘手不釋卷雖處軍旅亦然
故于義利之分古人成敗之迹知之甚習而見諸行
事卓有可稱于親戚故舊有婚喪不能舉者輒捐貲
助成之不少有德色其仁厚如此享年五十四

常三省

常三省泗州人嘉靖丙辰進士歷官湖廣叅議致仕
歸歷宦二十家無饒貲而性好施與雖至懸磬不顧
也淮流陡漲多方防護城全而泗人免于墊溺水侵
祖陵憇以分黃導淮之策言于行河使者卒用其議

以襄成功撫督河道楊公疏言河工就緒 祖陵有
磐石之安旣蒙 聖恩叨受殊賞切念臣等不過焦
頭爛額之人乃尚有曲突徙薪預揭利害如原任叅
議常者乞增秩起用以明 聖世有功必錄之意疏
雖不報至今鄉人誦德無窮焉

劉繼文

劉繼文靈璧縣人嘉靖壬戌進士授萬安令清苦愛
民蠶奸革弊召入禮曹改給諫出叅政浙江時有妖
僧惑衆立除其奸考滿時宦囊如洗與海忠介頡頏
書天下清官第二後巡廣西平東蘭土知府常應龍

之變以功蔭一孫入冑監致仕以上壽終于家

余翺

余翺字大振定遠縣人進士由南道御史丁憂復除四川道以議大禮謫戍卒隆慶元年贈光祿少卿

李國士

李國士字汝志亳州人萬曆丁丑進士授豐城令以治最選刑科給事中故事省中有疏先白政府曰倘關白而有所撓將終不得言耶竟以是與政府左出爲浙東僉事輶車所至風清弊絕上虞令蔡叔遠爲鄉紳金某所持奉 旨鞠問金謂令與同鄉語輒侵

之抗聲曰吾爲 朝廷治亂民不知其他金乃伏罪
晉陝西副使清西安四衛隱糧萬餘石尋以叅政晉
右布政守蒼梧徭人與編民鬩跳梁甚咸議移兵以
討但遣一幹吏諭之徭人輸服思明之役調兩省兵
七萬部署其事轉輸無乏因檄以監軍冒暑雨瘴厲
出其不虞兼程而抵太平賊聞之氣奪乃諭以脅從
罔治之意降者三萬四千人斬獲獻馘者千計晉山
西左布政使決計乞休疏上而遂拂衣歸矣享年七
十有五

馮應京

馮應京盱眙人萬曆壬辰進士授戶曹博學閎才高
名震世僉憲湖廣值中使陳奉貪噬無厭先以好語
諭之再嚴祛其狐鼠終於勿悛乃疏其違 旨九事
未得 命竟爲中使誣傷初僅外謫楚士民有捐脰
稅璫之門者有伏 闕交章乞還原職者以數十萬
計 上愈怒逮訊下錦衣獄禁錮三年因與同志考
太祖經制之詳而表章之甲辰天變厯 聖慮得釋
歸里復冠帶以疾終所著有經世實用月令廣義等
書行於世

人物考卷之十八目錄

南直隸蘇州府一

高啓

郭翼

張介福

滕德懋

余燾

王英

陳祚

何源

陳則

張洪

呂昭

盧熙

王遜

曾燿

尤安禮

許思溫

卷一百一十五

居性

趙友同

殷奎

錢甦

吳文泰

王履

黃鉞

俞貞木

錢芹

附王賓

韓奕

王仲光

錢廸

顏琇

枚應發

王洵

王淳

莫轅

吳淳

王行

瞿嗣興

楊基

宋克

姚廣孝

李蕢

袁政

劉璉

王進

王永和

陳謐

俞士悅

劉鉉

本朝京省人物考卷之十八

南直隸蘇州府

高 啓

高啓字季迪吳郡人生元丙子少警穎力學遂工於詩上窺建安下逮開元大曆天資秀敏故其發越特超一時東吳騷雅士咸推轂焉爲文尚氣多辨難攻擊之體讀之疊疊忘倦張士誠有浙右時羣彥多從仕者啓獨挈家依外舅周仲達居吳淞江上歌咏終日以自適尤好權略論事聳人聽一時武勇多下之明興以薦偕謝徽等聞於 朝與修元史授翰林編

修復命教授諸王父之推任喉舌之司待以不次與
徽等懇辭乞歸田里制可仍賜金以還復居江上遨
遊青丘甫里之墟始號槎軒又號青丘子銳志不衰
先是啓嘗以史與祭酒魏觀雅相知契會觀守蘇州
爲徙居城中延問政事得失援見甚密會觀得罪連
坐死年甫三十有九

郭翼

郭翼字義仲崑山人少嘗學問與衛培游亦通經義
言王氏易摘辭必範之古有奇氣揚廉夫極重之謂
可幾太史左氏詩亦質有骨體與顧瑛孝彥伯礪等

相和皆服其氣調翼見羣雄方逐鹿東南欲一有所
用之嘗獻策張氏云明公仗馬箠下婁地及越數十
城望風請服者人皆苦元政守吏貪殘自恣不恤其
下非能極慮安危者也故民離散而莫與之守今誠
能反其政休勞之率以乘時進取則霸業可成若遽
自宴安湛於逸樂不惟精銳坐消且四方豪傑並起
相攻壤進地益雖欲閉境自守勢將日蹙且吳又所
必爭也其能保乎哉言剴切忤士誠幾欲殺之其妻
勸之云郭生策未爲非縱不能用當善接之使無望
我翼遂得逸去洪武間徵授掌故自以遭時不能建

立功業快快卒獨所爲書有傳者

張介福

張介福字子祺自覃懷徙家長洲少從許衡游衡所爲學以道德自命福遂操軌迪踐制行有幅無或斥越自以不及養不仕以祿食家故貧寒不能具夾襦或以紵絮遺之不受雖纖介必以禮至死不移張士誠亂兵入其家危坐不爲起命導之他所發其藏不應以刀斫其面傷仆地醒復取冠戴之坐自若兵怪以爲晝乃見異物驚走去又恐或發其墓往廬焉士誠聞而欲致之不可

弟往問語以無樂亂無貪

天禍無忘國家者饋之力辭焉病且死猶爽然謂其友曰吾志慕古未能萬一惟毋污於時庶幾哉

滕德懋

滕德懋字思勉吳縣人元季爲浙江行省掾叅政朶耳只班討方國珍辟爲叅謀渡海颶風大作舟且覆德懋神色自若國珍降留撫台州三年台人德之

國初徵擢丞相府掾從征陳友諒除知信州以才力不逮辭改建昌同知時陳氏故相王溥守禦建昌所爲多不法德懋以大義律之多所悛改進知潭州再進湖廣行省左右司郎中召拜兵部尚書坐事卒

德懋才辯豪爽器量宏偉其學長於奏疏一時招徠
詔諭之文多出其手子枋字用載有文學與從弟權
皆被召用

余 焮

余焮字茂本崑山人家故鑷工少儻慧喜學問有志
當世洪武中以薦辟徵入內廷召對稱旨焮爲人長
者未嘗譖毀人其以事見疑者每進微喻有所寬釋
上篤嘉之而亦長於吏治所在著聲無何遂以通
政司叅議特拜吏部尚書後免歸居家尤恭謹過里
門輒下遇故時所往來者必自稱其名以對若未嘗

貴顯焉

王英

王英字俊伯崑山人初從鄉校貢入太學以諸生選授監察御史久之高皇帝察其可用特命署都御史事而大書敦厚王英四字揭於殿柱以勵百官當時朝士以罪去者比比而憲臣尤甚英獨以秩滿陞刑部郎中俄出知寧海縣蓋欲以民事試之也及

文皇帝嗣位知英名召還復郎中尋擢陝西按察使丁內艱服除改山西秩滿仍命治陝已而得代還行至泗州疾作而沒享年六十三英立朝守正不阿旦

夕兢兢謹畏每顧其妻子曰吾以身許國其勿以死
生爲意但吾獲死於正足矣乃絕不問家事而時具
疏有所建白上知其忠直也多嘉納之然疏入輒
毀其藁人不得知也及長臬司務以簡靜爲治獄至
而決雖不爲強辯深文而巨奸宿蠹恐懼首服不能
隱其罪至待寮友和而正寬而有容凡所設施人皆
取以爲法固有千里之外聞其名而感慕者去世已
久凡與之處者猶不能忘葉文莊爲鄉後輩拜其遺
象贊之爲名賢至於今邑人尚能談其往事者嘗一
日行道傍有負鰥者擠墮水中怡然攝衣而歸他日

復遇於道其人知爲英也棄所負而走使人追還之
嘗微服入吳市門時適有禁門者執爲庶民宜有罰
笑曰吾官人也門者不信取冠服示之始釋其縛亦
不怒邑令盛設酒饌以待辭之竟赴鄰翁飯或怪之
曰鄰翁貧治具不若邑令之易且官府吾可輕入其
門耶至人有以私事干者輒遜謝之曰吾不能爾其
垣夷而峭直大率類此

陳祚

陳祚字永錫吳縣人自庶吉士叅議河南以言事黜
均州力田宣德初召爲御史復疏言帝王之要載在

典籍具以質言所爲明興壞之端在薄嗜慾謹游幸
審忠邪之辨若此之不愼徒步法何爲且何以建利
去害錯世於安而不傾 上疑其言有所褒毀刺非
抑損當世之意遂逮治請室且籍其家禁五年乃得
釋復其官則親已前死獄中乞行服不聽又乞歸葬
乃聽後按閩擊去方岳而下甚衆代還視河渠重劾
將漕者雖蒙宥令惶恐謝又按楚言 遼王事 上
怒械治論死尋赦出之侍郎吳雲者薦其屬吳悅悅
坐死而文法吏因文治其罪雲以釋憾悅自剄祔上
言爲理者用法不平以私上下其手亂舊章應死

上是之因著爲令遷按察僉事福建得謝歸卒年七十五祚性刻廉有所爲奮不圖難操裁太過不無逆戾人情然能苦體蹈危險若甘之人亦矜其壯氣尤怨亦復少損焉其後世官亦有顯者

何源

何源一名德源字幼澄吳江人洪武間領鄉薦授保德州學正陞德州知州歲旱鄰治多蝗不入源境陞梧州知府梧多水患民有流亡衆議具奏賑之德源曰若俟奏報民皆死矣乃首捐已俸次募義民出粟賑給民多賴之又悉毀境內淫祠後以誑誤謫交

趾英國公張輔舉署交州學事多所造就士之以貢
選至方岳者十餘人後 召爲吏部考功員外郎出
爲鄭府長史復改吏部文選郎中正統間擢江西右
布政致仕源爲人溫雅歷事五朝文章政事見稱一
時卒年八十六

陳則

陳則吳人以秀才舉治中應天俄進侍郎戶部以閱
實戶口調同知復遷爲守則與高啓等齊名詩亦豐
縟俱以召命行後議選士法頗可采

張洪

張洪字宗海常熟人生甫五日而母郝亡父客燕不
歸靡所顧復張翁炯媪丁憐而乳之故姓從張幼穎
獻詩書牘傳精理神會識者訝其非凡踰冠以比隣
事連戍滇黔寧王一見才之遇以國士與都護瞿友
善無何夷木邦刁于孟亂逐酋長思倫法 高皇帝
詔三司議剿撫便計衆謂雕題互攻我可勿預洪間
語瞿曰思倫法擁三十六甸之衆嘗入寇邊圉今雖
警黔寧之威其強未殺日者之亂實天授我宜討木
邦而示威分建彼被逐得復戴賜無窮是恩威並流
固內弼外完策也三司以其議上 上俞行遂捕斬

刁干孟以其子與思倫法並授宣慰使而西南耆定
尋以明經授靖江王教授稱病免永樂元年以行人
徵至京師旋使日本復使吐蕃餽一無所受冬而
往逮夏歸裘葛不更人服其介久之緬甸那羅塔殺
孟養宣慰而據其地奉詔責羅塔歸所侵地六往諭
始如詔竣事晉行人司副洪熙元年擢翰林院修撰
宣德初同修 仁廟實錄五年引年致仕比歸杜關
謝將迎日事著述有周易會通尚書補傳詩本補遺
歷代詩選史記要語等集年八十有四卒

呂 昭

呂昭字克明崑山人嗜學敦行洪武中以薦授徐州訓導上疏言民事稱旨改浦城縣丞縣多荒地昭以俸資市穀給無產者俾藝其地而不責其償縣以富庶永樂中陞沁州知州父老持金爲贈皆謝却之然僅至杭已不能顧舟狼狽而歸比赴沁道出徐州天寒尚未挾纊故所授經弟子共爲買一毛裘顧一驢以往其子且旣舉進士昭遺書戒之曰進士美官然不能廉終非吾子死亦不歆汝祀其廉戒如此旦字寅伯初任河南按察司僉事以事去職後以薦起爲建昌府推官正統間致仕性亦高潔環堵蕭然未嘗

以貧窶爲意及卒不能喪蕭山魏文靖公驥遣人買棺歛之

盧熙

盧熙崑山人洪武中以薦授睢州同知明年行州事適使者至逮民而實其伍必取盈於數少留令者卽以抗 旨論熙不爲動上更戍者數人後雖盛怒以加之不動也未幾卒於官貧不能殯吏民相與歸其喪送者塞途遇大雨無一人避去者熙旣慈仁又該博達於政務與兄熊俱有名於時

王遜

王遜字謙伯崑山人以洪武間進士選擢御史已出
爲上高丞治行有能聲復召入性剛廉峭刻以擊搏
爲名高不稍避忌人或規之君不虞後患耶遜曰虞
患思避隱忠不竭其又能得全哉且使撓而從之何
稱死官下耶卒侃侃自若子復亦以進士任御史然
直氣少折矣

曾 燿

曾燿其父自錢塘徙家吳少學春秋於魯道源洪武
間選於鄉令黃陂三年人懷吏畏召侍讀禁中修典
令備顧問卓然能其官命使交南還陳黎氏父子冤

惡相濟所以當討狀令之贊師有功永樂間交南叛再使燿往卒於富良江子堅亦以進士官蜀藩

尤安禮

尤安禮字文度長洲人父義字從道元末辟樞密掾遭亂屏居二十年洪武中舉人才授湖廣布政司經歷以廉謹稱性沉厚明哲處患難不失守著元史輯要藏於家安禮尤純厚少從父寓武昌與楊尚書翥楊文貞士奇友善相厲以德業歸補生員巷邂逅一姝若將獻笑者安禮亟引去後不復由是路同學生陳文學當遠戍泣告安禮吾必不生還妻當弗能守

柰幼女何安禮曰安禮存無爲慮此吾有子當娶之
已而陳果死妻克守義安禮無子以弟之子爲後卽
聘之弟以女有疾不可安禮曰吾豈食言於亡友卒
娶之安禮教諭崇安秩滿諸生詣闕請留上命增
秩還任尋擢武庫郎中有馬主簿面肆謗詈安禮走
徐言馬君改常矣旬日馬死擢貴州叅議病歸不出
太守况鍾朝京師文貞問安禮起居鍾謝不知及歸
往候之見所居隘陋欲割官地益之堅謝不受安禮
平居若無可否至辨認理欲毫芥不苟孫淳字公厚
爲平陽教諭遷知鉛山縣改永年居官廉慎致仕歸

卒

許思溫

許思溫字叔雍世爲吳縣人洪武二十六年貢胄監
聲譽籍甚二十九年朝廷選學成行優者於六堂
授之以官擢思溫刑部尚書郎尋除監察御史改知
揭陽縣未任命復故秩三十年陞北京按察司副使
奉勅往永平府所屬灤水六州縣集民丁永樂元
年以守城功陞授刑部左侍郎二年選兼左春坊左
贊善三年丁外艱已轉階通議大夫以疾卒年四十
有三思溫質雅樸直不能與物低昂故每不偕於俗

幸逢 聖明之世竟以自全而不究其大用人咸懷
之

趙友同

趙友同字彥如長洲人友同初從父習黃帝書已遂
博通諸家善屬文溫麗典則宋濂與游數稱曰吾得
趙生意乃暢洪武間辟掌故華亭經明行修大爲諸
士悅服後姚廣孝以善醫薦於 成祖遂得召對又
有言其明於水利者令從夏原吉往吳中灑水道相
漕渠工畢乃以文學參侍從撰定功令及箋疏經義
勒成爲制大被眷注焉

殷奎

殷奎字孝章其先自華亭徙崑山受春秋義楊維禎所洪武初以秀才異等聞太常籍奏試一義稱旨官文學掌故因乞近地見忤調咸陽卽忠於所職教諸弟子文義甚美獨念其母不置竟鬱鬱死諸弟子私謚文懿先生奎爲文爾雅深厚不爲浮誇學亦頗究通天人分際所著書甚衆若咸陽志關中名勝集陝西圖經支離藁等二弟璧孝連箕孝揚璧薦明經奎卒璧徒步千里以其喪歸箕舉秀才試守僉事

錢甦

錢甦字更生常熟人博學閎辭卓有文譽洪武十年
應詔上書至中書省長揖不拜左右以爲言甦曰
未拜天子不敢先拜相公也遂於本省聽辦事務
數月不得召會有詔募撰祭元幼主文甦亦擬撰
內有云朕之得復吾中國之固有汝之失棄其沙漠
所本無上得之大喜卽日召見欲官之以老疾辭
賜歸里卒初名沂字伯與洪武初坐事當刑子迪代
之死故易今名曾孫昕字景寅宣德進士歷官湖廣
布政以廉慎著稱

吳文泰

吳文泰者吳人貧而湛於詩嘗從事幕府文書無所省與丁敏游無日夕吟不休二人者嘗閉戶共爲詩人見其終日突無烟往視之則方瞠目相對亦忘其饑也語皆厲苦若孟郊益僻蹇矣文泰洪武間同知涿州坐累謫徙雲中而敏流落江淮間有憐而館之然故狂生不能久悒悒遂謝去卒饑寒道路以死

王履

王履字安道崑山人學黃帝書於朱彥修遂盡得其術謂漢張仲景之論寒疾備矣而未言其變所謂上下無常合而並至偏害陰陽推本岐素爲立法考又

謂諸病陽明篇無目痛少陰篇言胃脅滿而不言痛
太陰篇無嗌乾厥陰篇無囊縮凡此必有脫簡於三
百九十七法有所簡汰益入之極論內外所中及暑
與風無以自繆也名曰渾沕論及他所著上參天文
下極地理人事諸家治法爲書甚衆履思旣精手敏
而視遠加之博綜方論道術善爲詩若文圖繪學夏
圭思腕有餘力故秀勁意在筆前故麗密嘗遊華山
爲圖四十餘系以詩時稱合作醫則究極原委後來
業者皆不逮

黃鉞

黃鉞字叔揚常熟人洪武初以生員薦授湖廣宜章縣典史建文元年舉湖廣鄉試明年進士授刑科給事中陞戶科左改禮科建文三年丁外艱方孝孺屏左右問曰北兵日南蘇常鎮京師左輔君吳人朝廷近臣今雖去宜有以教我鉞曰三郡唯鎮江最要害守非其人不可鎮江指揮童俊狡猾不可測蘇州知府姚善忠憤激烈有國士風但仁慈有餘御下太寬此治郡之良才恐不足定亂然國家大勢不在江南戎馬至此而禦之晚矣孝孺因附書於善善得書慟哭靖難兵至江上善受詔總蘇松常鎮嘉興五

郡兵勤王以書招鉞鉞卽日營葬訖遂趣善所時童
僂果以鎮江降靖難後 詔暴善罪捕善急善麾下
許百戶素機詐得親善縛善邀賞鉞聞之慟哭遂絕
食閉目三日求死家人救免或告鉞曰善欸服已得
宥鉞瞠目曰吾知善必無二心且少俟善事定吾死
未晚脫善果不死吾將下報希直遂復稍稍食是年
七月十一日善死報至鉞起登琴川橋西向再拜祀
善哭曰君今與希直同死國吾忍獨生乎祀畢給家
人歸祭具從容整衣冠奮身入水死時北兵四出捕
善黨籍籍言且併錄鉞家親族悉驚伏鉞友人楊福

具棺衾日夜泣橋側百方求鉞屍而得更數日屍忽
自出立水中福大哭抱起易服體猶不潰竟成禮葬
之福父潑早奇鉞鉞與福共學福亦有古行

俞貞木

俞貞木字有立世家於吳少聰敏稍長能屬文年十
五篤志問學欲以力追古人旣冠未有室人或勸之
娶貞木以學業未成謝弗聽永嘉陳公麟以易經擅
聲浙東西來寓吳中從之游多所開悟後陳公中進
士甲科出宰明之慈谿復負笈從之卒業時元季四
方兵起明瀕海爲郡尤多嘯聚之徒乃辭歸杜門不

出研考程朱氏之說直將上探羲文之秘奧居閒十
餘年視天下榮利泊如也 大明混一區宇始以薦
者言起家授韶州府樂昌縣令尋丁父憂服闋謁選
天官改南康府都昌縣令縣故有周元公朱文公祠
下車拜謁覩其室宇頽圯弗稱乃捐俸金爲倡大修
治之因以禮教其民翕然從化未幾政舉惠行郡將
上其績於 朝復丁母憂民到于今惜之及返鄉里
以親族犯法例弗起遂息交絕游屏棄世故間作爲
詩文以陶寫性情有集若干卷藏於家與人處雖甚
和易而中峭利不可犯蓋以誠確之資嘗潛心爲已

之學故與衆殊至於晚節益以清淨自娛安陸姚候
善來守郡折節下士數延致於庠行乞言禮然糠覈
不繼空匱愈甚不以介意靖難時勸姚舉兵勤王因
被逮以疾卒於京師

錢 芹

附王賓

韓奕

錢芹吳縣人幼厲志介廉以奇節著嘗從大將軍徐
中山之絕塞旣罷居貧漠無所營郡守姚公善折節
下士嘗貺米俞貞木誤致芹所芹以守賢者也受之
他日貞木以語守守願見不可期於朔日見於庠序
展禮賓之欲與行更老儀芹曰此何時也而爲此迂

緩不急之務乎將別出一書授守皆攻禦戰守之方也後姚死於靖難片與焉同時有王賓者字仲光性峭嚴遠於俗學無所不通毀形容異衣服箕踞道傍人不測也姚守聞而造之賓避去他日守乃屏人直入其室始克見之所告皆大事繫於時政守欲薦之朝終不敢發言後姚公廣孝旣貴歸見之掩面走姚守勤王實賓爲決策云韓奕者與賓俱以醫浮沉於俗姚守欲見之不得一日與賓突至其所而奕已走避蘆中矣守歎曰古稱名可聞而身不可見者韓先生之謂耶於時稱姑蘇三高士焉

王仲光

王仲光吳縣人學貫天人洪武中避地太湖中戊寅
歲儲君卽位有詩云數莖白髮亂蓬鬆萬理千梳不
得通今日一梳通到底任教春雪舞東風與袁柳莊
至契柳莊至燕遣子忠徹見於太湖以乾象詢之曰
此數莫逃問兵仗曰雖地窖無聲聞一勝後卽多有
矣回以告其父而知其言後姚廣孝還蘇州反初服
往見弗克見但云道衍一箇和尚做不結果後終於
家

錢迪

錢廸甦之子也洪武間甦當伏法廸年十八詣曹請代父刑上其事詔從之時又有徐植者父達以稅事當刑植亦未弱冠請代旣伏鎖猶從容賦詩無懼色二子俱常熟人

顏琇

顏琇字季栗吳人洪武初父戍鳳翔以母韓行琇獨留久之聞母歿卽奔赴負母骨歸行數千里未嘗釋於地寢則皮置之宿其下涉則戴之泳焉父旣放免奉事尤謹旦夕自洗厠踰其父勞苦之云幸不乏食又何以爾爲令人趨代亦竟不肯意將視父洩以審

安否也逮卒日夜號泣水漿不入口者五日不勝喪死子昌亦有孝行

枚應發

枚應發吳市人也事母孝母疾弗療發刲股進而愈他日又疾作發露禱於庭灼肌以代母痛願損已之年益母筭夕方晦忽開見斗六星惟一星尚隱頃則雲復合入視母母已擁衾坐云有六人來以水灑之霍然蘇

王洵 王淳

王洵王淳者父鑄辟爲都督府掾屬洪武初坐事鑄

當伏法洵淳號泣無日夜爭請代走御史言父以洵故懷祿洵不能有所以事之免於過應戮淳復進云由淳故不當坐父兄者御史訊其執志皆堅定無二聞於上特免焉

莫 轅

莫轅字巽仲幼慧悟從張適學適甚異之洪武初父繫治當刑轅年十一詣李請代李試答掠問誰教使轅無恐言代父死亦豈人所能相導耶遂上言之如其請父乃更爲轅陳非辜竟死於繫轅已釋季父侍郎禮方寵貴用事時持法嚴轅預恐及繆指一人戍

間左者爲其屬後禮見法轅竟以前被伍符免兄遺胤幾殄取而育之又間行求得其父骨歸轅屢觸網卒全已而遇赦宥旣痛其家禍深自刻責常茹糲飯蔬鄰失火勢迫躍入火抱其母出毛髮爲焦復得不死若其陰行善惠利人多矣里有賊禍少年葛嘗痕傷轅衆執焉且陳其殺人狀於郡轅曰葛所殺三人者死溺耳欲逸之不得深爲惋惜姻沉生坐法有遺孤女字劉劉又他適轅乃長而歸之鄰有舉室死疫者遺子人無敢視恐厲延又收養之素與鄉先生張子宜易九成遊故亦長於學問

吳淳

吳淳字伯善長洲人少與兄學兄中遭疾廢不良於行者二十年元釁作人不自保淳負兄趨避之遇強暴刺以刃淳以身翼蔽中三十餘創昏仆於地兄竟死淳復蘇得入餘杭山蜚遁以終

王行

王行字止仲號半軒吳縣人家本微父爲人行貨於都市以行操挈從時尚髫年藥踰千品能別其上下品輕重之主媼喜聞諸小史稗官行卽默記數本時時爲陳說主異焉授魯論一帙翌日已成誦矣遂大

奇之盡以所度經史百子恣其探閱既已遍讀卽辭去游諸生間與言濟南生詩伏生書孔安國禮灑灑詳盡人咸異焉然視其居徒壁立故未嘗有留冊也問所從來曰向得之藥肆翁其爲文汪洋奧美氣陵一時老生皆望而畏之臨川饒叅政介之分守浙右以詞翰豪視東南號醉樵間延與語卽席授簡不加點竄饒仆地曰吾見中朝才儁亦夥未有類子敏而奇者真天才也三吳鼎沸時多壘礮石自固行私語人曰兵法不云柔可以制剛耶或詢何居曰設植蕩篠頎而偉者繫布於其端如帡幪然人出沒其下雖

礮至而布必隨之低昂則人無害而不可盡矣後大將軍常公提兵至果用是計而城破靡不服其談兵之有徵也洪武初辟本郡文學諸生心易之至以五經雜進問難析極蘊奧泊刪潤課業刃迎縷解至是乃吐舌曰王先生之不可以蠡測管窺也如是乎自負其材欲有所見將擬上書 天子或尼以法網固密非儒者渙優之日乃微哂曰虎穴尚可嬉吾韋布士何室哉往客藍玉玉立談大賞識之賓爲上客行將薦于朝而玉以事籍没其客皆賜死行亦與焉

瞿嗣興

瞿嗣興字華卿常熟人父達元初爲百夫長遷蘇州
巡鹽大史兼管內六縣捕盜長興時年方髫髻而天
性純慤依依親側若不忍斯須釋者母患癰癰潰當
長夏臭穢不可近興燐湯洗滌執扇驅蚊蚋靡晝靡
夜至月餘乃休旣而又罹積氣疾衝擊下上百藥不
治或授以割股可療法祝刀於天俟刀躍方可用頓
顙流血刀弗動情迫切強取刀割股肉作羹以進母
不食已五日忽盡啖之氣銷如失一旦母思芟食時
芟始華求諸市不獲凡川有芟者解衣入水歷覆其
葉覓之雙脰皆赤腫興號呼曰神胡不相我乎俄得

三芟人以爲精誠所感然其宅心仁厚單窶者心思賑給而不欲使其知鹽工王氏家無擔石儲且卧疾不能興鷄初鳴往其門以錢二十緡投窻隙而去民有告糴者鷄衣百結受其直五千復佯問曰吾性多忘若欲糴十千耶遂如數與之鬻蔬翁過門市錢五十文以楮幣五百文授翁合補餘錢翁愠而辭曰汝第持去他日見還未晚也負販夫或來貿遷一聽其言不與較家人怪之曰彼竭汗血以逐什一之利寧能足吾欲乎歲大儉來相依者數十人擇旁近舍舍之會厲氣作病者相枕籍每晨躬攜粥藥撫視卒賴

以全偶朝出道中拾遺囊悉歸求者一金不自私未
幾又有忘契券及白金者見之蹙額曰白金尚易致
質劑乃資業所憑其必起爭端乎密偵其人還之某
人勢家奴因失主物畏懼幾欲死謝曰三尺微命孝
子所賜也興雖不讀書其篤行類鄒魯士州里翕然
稱之年且耄子莊宦學有立洪武初擢禮部員外郎
喜動顏色其後病且革言不及家事惟曰死生恒理
爾煩語吾兒莊善事 聖天子母以老身爲念遂終

楊基

楊基字孟載其先蜀人大父宦游江左而基生吳中

遂家焉穎敏絕人九歲能背誦六經著書十萬餘言
名曰論鑒試儀曹不利會天下亂歸隱於吳之赤山
張士誠時辟爲丞相府記室未幾辭去又客饒介所
王師下江南籍錄諸陪臣基以饒氏客安置臨濠旋
徙河南洪武二年放歸尋起爲滎陽知縣謫居鍾離
久之被薦爲江西行省幕官以省臣得罪落職六年
又起奉使湖廣召還授兵部員外郎出爲山西按察
副使進按察使後被讒奪職供役卒於京基尤工於
詩初會稽楊維禎客松江往來吳中以詩自豪基嘗
於坐上賦鐵笛歌維禎驚喜與俱東語所從曰吾在

吳又得一鐵來矣若曹就之學優於老鐵學也至正
洪武之際與高啓張羽徐賁齊名號吳中四傑所著
有眉菴集

宋克

宋克字仲溫一云南宮生長洲人少英槩以武力自
憚擊劒跡射學爲兵將北走中原從豪傑馳逐會士
誠據吳度其無成思欲保其鄉井不能遠去已乃謝
客杜門闢一室置歷代法書周彝漢硯唐雷氏琴日
遊其間以自娛臨魏晉書窮晝夜不廢遂精其藝真
行章草皆妙盡古法允明論克書謂如初筵忽見三

代鹵彘蓋亦天授非人工能逮克少年豪俠面折人
議論無所假晚務自閤歆慕靜退時賦詩見志怡然
處約以終其身

姚廣孝

姚廣孝長洲人初爲僧名道衍字斯道居相城妙智
菴時相城靈應觀道士席應真者讀書學道兼通兵
家言尤深於機事廣孝從之執弟子禮於是盡得其
學然深自退藏人無知者其友王止仲獨深知之曰
他日必有所遇恐終不得自韜匿也洪武中以高僧
薦選侍 文皇於燕邸一見以爲天授深見親信數

以奇謀進起兵時多其畫也迄于成功所籌皆闕密人不得聞或以爲通於數跡甚幻永樂中以靖難功進官太子少師復姓賜今名擬於元之劉秉忠卒贈榮國公謚恭靖配享廟廷初靖難之功廣孝未嘗自言文皇屢欲官之輒辭一日召見令人潛以冠服被體亟命宣謝不得已受命終不蓄髮娶妻所居多在僧寺然文皇眷禮彌篤每稱少師而不名及病篤幸其第問后事對曰出家人復何所戀強之終無言文皇念其功特官其養子姚繼爲尚寶少卿廣孝博通內外典亦工文詞所著有逃虛子集別有道

餘錄則專詆程朱蓋其天姿超曠不屑依人爲可
故自伸其所獨得者如此

李 蕢

李蕢字茂實長洲人永樂中進士除兵部武選司主
事歷員外郎郎中在武選司二十年受知於尚書方
賓陞太僕少卿靖遠伯王驥征麓川奏蕢爲佐俄丁
父憂 詔起復視事事竣陞工部侍郎始乞持服服
闋以兵部尚書鄺埜薦改兵部侍郎卒於官蕢勤敏
有吏材習知兵事所在著聲凡邊郡地圖險阨遠近
無不周知爲埜所倚重焉性沉厚不苟居鄉里未嘗

以貴加人每出必步過里門上馬終其身如一日

袁政

袁政字文理吳人少學於俞貞木所永樂中召起爲湘陰令民喜窳惰不能力作每徵調則多逋逸而令乃當坐政爲教以墾田力耆治生業遂因以饒復以夏原吉薦遷守遂寧未至間止於亭夢小兒被血者盈望問知郡人貧產女不舉乃嚴爲之禁又示之禮送女無過奢俗因以革政蹟聞於時

劉璉

劉璉字廷璉崑山人永樂十年進士任陝西道監察

御史陞山東布政司右叅政洪熙元年叅贊宣府軍
務宣德十年兼督邊儲陞戶部右侍郎尋轉左侍郎
仍兼巡撫累降勅褒獎有秉公正之心勵廉潔之行
勤謹詳明夙夜無懈之語璉公勤廉謹人不敢干以
私在邊數年終始如一日其以首功上者必審喻之
云爾果陣而獲於何所遇敵力戰何狀人無敢冒賞
者其後都御史李秉督邊儲悉依璉法景泰二年致
仕卒於通州不能歸遂卽其地葬焉天順三年葉文
莊公盛叅政山西奏璉在邊年久保障有功乞恩褒
恤於是 朝廷遣官 諭祭遷葬崑山

王進

王進字汝嘉其先京兆人家蘇之長洲汝嘉自幼喜學問穎敏異羣兒十歲從師受經下筆敷繹義理已津津動其長者侍其父松江君宦游浙東西所親炙日廣造詣日深矣平居孝親敬兄一本於至性嘗坐累謫戍五開後舉明經爲武昌府學訓導歷九年陞大庾縣學教諭所至盡心啓迪學者率見成效初被召修永樂大典爲副總裁又召修四書五經性理大全書成皆受重賜遂陞翰林五經博士秩滿陞侍講永樂中考鄉試應天府廣西廣東各一考會試禮部

二無敢于以私者洪熙初建弘文閣時翰林學士楊
君溥偕汝嘉四人者受命日直其中禮遇甚厚汝嘉
與人交久而敬澹而可親內貞外和識學該博尤熟
書春秋爲文一傳於理勤修職務雖老不倦雖風雨
寒暑不自逸而折衷羣議詞氣從容簡而實當故卒
之日自大學士而下咸走會哭已而共咨歎曰當
國家用儒之際兩朝史事方嚴柰何喪文學老成人
羣相悼惜

王永和

王永和字用節號梧竹崑山人神氣爽邁異於常兒

幼時有誘以學奕者永和曰是惡足學取其枰立碎之既而從學邑庠日記書千餘言久而不忘大父得疾永和日躬侍湯藥至廢寢食父有疾伏枕十八年無頃刻少厭怠臨卒語之曰吾病不能養老母賴爾能孝吾瞑目無憾矣其孝行見愛於親類此年踰弱冠舉永樂甲午鄉貢以大母及母皆在堂未及會試後卒乞就教官以便親養得嚴州府儒學訓導尋丁大母憂服除改任饒州府所至誨導諸生多有造詣至於誘掖所司作興學校獎進賢才尤惓惓焉時饒聖廟阨壞請修于守不應和責以太守維風俗不知

重教化何以率先吏民興禮樂哉歲滿與同以教官
考績至者羣試於吏部名在首選吏部尚書蹇公獨
器重之暫禮致爲塾師比當奏爲兵科給事中居官
務持大體而略細故人以爲得近侍之體嘗副駙馬
都尉王誼爲使持節行冊親王視糾正受冊執事
之儀觀者爲之凜然還掌科事劾侯尉馬順怙寵驕
淫妄厲威福爲宵小所憚秩滿遷都給事中未幾擢
工部右侍郎預董營建宮殿之事殫力盡心不知勞
而事速濟爲同僚所敬服嘗往巡視淮南諸郡旱蝗
訪求民所利病悉得其實而致便宜於民比還特受

命掌部事奸弊爲之一清河決山東河南諸郡改而北注漕河被其潰溢受命往治之鑿呂梁疏支河濬泄有方軍民受其惠者不可勝計比還遂以能事簡預扈從北征竟殞於軍景泰初贈尚書官其子評事後子霖登進士復爲給事伉直不墮其父風

陳謚

陳謚字有戒別號介菴吳縣人登永樂壬辰進士擢監察御史歷湖廣副使丁內外艱乙卯陞右副都御史鎮守陝西兼提督寧夏延綏等處邊備凡論軍民利病先後一十八疏悉賜施行又三年陞右都御史

詔同靖遠伯王驥整飭延寧甘肅沿邊軍務乙丑還
朝專掌院事己巳大駕率六師巡邊謐居守己而虜
寇犯邊遠近駭匿羣小不逞攘竊爲盜陞謐左都御
史撫安近畿軍民及安插口外之來避寇者明年陝
西旱甚出撫陝一年還掌院事如故賜玉帶白金彩
段羊酒謐性寬恕凝重豐髯而偉容在官持大體略
細故風裁儼然在陝西撫安禁戢威惠並著督輸運
精選練修城池興水利處畫政務曲盡事情雖北虜
黠詐邊城數警常先事爲防賴以無患於延綏要害
處奏置靖虜衛於寧夏甘肅邊境增立墪堡千餘所

至今賴之陝西屢旱力爲拯救奏減徭役蠲逋負發倉廩賑貸人以勿困故至則合境出迎拜伏驩呼去則攀轅卧轍號泣挽留旣去民人私相尸祝至有疾痛號於謐祠若響應者遂神明之其得人於關陝如此會以疾弗良於行疏乞致仕上命給驛遣醫護視以歸居三年而疾增劇遂卒訃聞上嗟悼內出祭文遣行人卽其家致奠命有司營葬如制

俞士悅

俞士悅字仕朝長洲人自幼讀書過目卽成誦永樂乙未進士擢監察御史陞湖廣按察副使綱紀振肅

貪濁悉自引去民居不戒於火延及臬署僚屬皆奔
避士悅具衣冠向火再拜風徐返火滅歲旱有司用
道家法焚蛇喋燕而旱彌甚亟命屏去乃齋沐露禱
得雨連三日秩滿陞浙江叅政初至佯若不解事者
羣吏易之越三日發奸擿伏如神豪猾破膽正統壬
戌倭寇犯境士悅城汴潑二浦以備至今賴之尋陞
河南右通政使甫三日召還陞大理寺卿己巳之變
陞右都御史留守京師協都督衛穎帥師六萬守德
勝安定二門士悅晝日籌畫甲冑未嘗去體事平陞
刑部尚書進太子太保天順改元謫戍遼東成化初

赦還復其官卒年八十士悅儀表魁岸面色如鐵聲如洪鐘不類南產平生剛方侃侃見者畏服

劉 鉉

劉鉉字宗器長洲人生彌月而孤數歲入鄉塾輒有志向學未冠卽授徒里中從之者甚衆其言動規模如宿儒母遭疾刲股肉以進旦夕籲天求代比沒哀毀垂絕見者莫不敬歎事兄若嚴師雖加楚箠不怨迎寡弟養於家從父沒而絕嗣以父命出繼之永樂戊戌以善書徵入翰林明年中京闈鄉試未上春闈授中書舍人宣德己酉與修 兩朝實錄成 賜白

金文綺陞兵部車駕主事仍蒞事內廷正統戊午與修宣廟實錄成進翰林侍講戊辰詔擇進士穎敏者爲庶吉士屬鉉教之鉉慨然以師道自任力追古作有一字未協者經月不置以故諸吉士大有所造後多以文學致名己巳進侍講學士景泰庚午主考京闈及揭曉第一人劉宣乃盧龍軍士同事者欲更之鉉曰朝廷立賢無方乃止鉉未沒宣己第進士爲翰林學士矣初置經筵官居首選賜白金文綺禮遇甚隆辛未夏不雨特遣祭四瀆壬申春缺祭酒衆難其人大學士高穀曰學行老成無如劉某者

遂抗章薦之 命下以鉉爲國子祭酒鉉乃定程課示教條旦暮講解如恐弗及及有託權貴以求倖得者斥弗聽六館士帖然明年丁養母艱服除仍拜祭酒天順改元 英皇復位念宮端必求宿德之儒遂陞少詹事日侍講讀輔道惟謹二年卒於官年六十五 上聞訃哀悼曰安得學行純篤如斯人者遣禮部侍郎李紹諭祭其家贈禮部左侍郎謚文恭鉉性介特絕輒媚之態立身以不欺爲主未嘗疾言遽色尚儉約已貴而猶儼居隘陋裕如也祿賜之餘必分惠宗族故舊之貧者恒館粟之僚友卒而乏者爲具

後事又教其孤鄉人有繫逮不能明者爲白其寃其人懷金以謝鉉麾而却之仲子瀚以進士使南戒以見利無苟得閱其衣篋以行比還仍閱之如故乃喜曰無玷吾門矣平生耽嗜文籍博極羣書素有醞籍爲文務造至理詩古淡有餘味立朝無惰容不以寒暑久速少變所志堅類如此有假菴若干卷稿藏於家

陶

承旨又次同副石

九迭進都同

斤籍收故早

乃遠復野